



Informativni bilten Općine Vareš



FESTIVAL „SEDMICA BOSANSKIH KRALJEVA“

Posjeta Kraljevskom gradu Bobovcu

U okviru Festivala „Sedmica bosanskih kraljeva“ koji se održava 29. 06. – 05. 07. 2010. godine Bobovac su na dan 04. 07. 2010. pohodili kralj i kraljica. U 11.30 h kralj, kraljica i njihova pratnja su dočekani pred općinom Vareš, a potom je uslijedio posjet staroj srednjovjekovnoj Crkvi sv. Mihovila, kratko upoznavanje kralja i kraljice sa povijesnim činjenicama ovoga kraja. Oko podneva kraljevska svita se zaputila prema Bobovcu na kojem je uslijedilo simbolično predavanje ključa mauzoleja koje je upriličilo UG „Čuvari bosanske krune“ iz Dragovića, a ključ je preuzeo Neir Ibrišimović koji je preuzeo ulogu ključara te se nastavilo prema Mauzoleju.

Na platou ispred kapele su nas dočekali „kraljevski čuvari“ Emir Ahmedović, Hamza Kovač, Darko Ridić i Sanel Jozeljić sa lukovima, strijelama, i mačevima koji su pristupili kralju. Njihov predvodnik Dalibor Jozić je simbolično predao ručno kovani mač, koji je samo za kralja otkovao kovač Mijo Jozeljić iz Očevije.

Nakon toga kraljevsku svitu je dočekala Ana Šurkić koja im je poželila dobrodošlicu sa riječima:

“NAŠOJ KRALJICI”

GDJE SI KATO GDJE SI SESTRO
MILA, SEDAM STOLJEĆA JA SAM
CRNA BILA

CRNA BILA ZA TOBOM PLAKALA,
DA BIH DANAS OVO DOČEKALA.

SVOJU KATU NA BOBOVCU GRADU,
GDJE SVOM PUKU ONA VRAĆA
NADU.

UG „Naš dom“ iz Borovice sa svojim folklornim sastavom je otpjevalo ove Anine riječi na stari izvorni način.



Nakon nastupa ključar Neir Ibrišimović je otvorio mauzolej te uveo kralja i kraljicu u mauzolej u kojemu su pokopani vladari Bobovca, kralj je razgledavao postavljeni prikaz prošlih vremena te slušao predavanje turističkog vodiča Admira Čizme o povijesnim znamenitostima ovoga mjesta.

Nakon ovih informacija, oduševljen dočekom, ispunjen emocijama kralj je poželio da se obrati svome narodu, te smo ga propratili do mjesta predviđenog za govor, gdje je kralj sa svojom kraljicom okružen tjelesnom pratnjom održao govor iz kojega izdvajam par riječi koje je on uputio svome vjernom narodu: „*Nađoh zemlju Bosnu, lijepa je kao što je i bila, visoka kao i uvijek, bistra kao i onda kada kraljica i ja se ogledasmo u rijekama njenim.*

Dođoh da ljetujem u svoj dvorac na Bobovac, u Kraljevski Mauzolej svojih velikaša, uživajući u domaćem piću, igri i pjesmi. Nađoh mnogo toga, čemu oči vjerovati nisu mogle, limene kočije, željezne ptice, velike dvore i pisma što na dlanu sviraju i svijetle, a onda nađoh i ljude, više nego što se i zamisliti mogu, pa kako onda ne naći osmijeh i ljepotu, prijatan pogled, prijatan dodir zemlje Bosne i dobrih ljudi“.

Nakon ovoga zanimljivog govora kojim je kralj pobrao veliki aplauz okupljenog naroda, svi su pozvani na sudjelovanje u srednjovjekovnim igrama – gađanje lukom i strijelom te povlačenje konopa koje su organizirali mladi iz Vareša te koji su sa posla osiguranja kraljevske svite prešli na organizaciju sudjelovanja u igrama.



INTERKULTURALNE KREATIVNE SEDMICE (IKS)

Općinski načelnik je u petak 25. 06. 2010. godine ugostio sestru Magdalenu Schildknecht, direktoricu UG "NARKO-NE" te predstavnik mladih Vareša Tarika Kovača, Jasmina Alihodžića, Erlbeka Kristijana, Janu Šoljak.

Na sastanku se razgovaralo o planovima i aktivnostima koje će poduzeti mladi Vareša u koordinaciji sa Općinom Vareš, a u sklopu projekta-programa Interkulturalne kreativne sedmice "IKS".

Interkulturalne Kreativne sedmice "IKS" je projekt koji nudi mladima interesantne i zabavne preventivne aktivnosti tokom ljetnog raspusta, i tako doprinosi provođenju kreativnog i aktivnog slobodnog vremena. U suradnji sa općinskim vlastima, UG "NARKO-NE" realizira ovaj jednomjesečni projekt već sedmi put u Vitezu i drugi put u Varešu. Četiri sedmice u toku ljetnog raspusta organiziraju se radionice gdje mladi koriste i razvijaju svoje stvaralačke, kreativne, umjetničke,

socijalne i organizacijske vještine. Radionice planiraju i organiziraju studenti socijalnog rada, pedagogije i više umjetničke škole iz Švicarske zajedno sa srednjoškolcima iz Viteza i Vareša.

UG "NARKO-NE" priprema projekt na licu mjesta. Poziva mlade lokalne zajednice na dobrovoljno angažiranje, mladi se educiraju unaprijed o prevenciji ovisnosti i unapređenju zdravlja, organiziraju logistiku za grupu volontera i promoviraju projekt u lokalnoj javnosti.

U Švicarskoj je za projekt "IKS" prošle godine osnovana organizacija „Verein IDEMO“, koju su osnovali bivši učesnici projekta u Švicarskoj. Cilj ove organizacije je da se razvije kreativni potencijal mladih ljudi iz različitih kultura i da se kroz volonterski rad prevaziđu društvene, socijalne, generacijske, kulturološke, nacionalne i religiozne barijere u Bosni i Hercegovini i u Švicarskoj. IDEMO koordinira stručne i organizacijske pripreme studenata u Švicarskoj te se brine o namicanju sredstava za putovanja i smještaj studenata kao i za osnovne lokalne troškove projektnih aktivnosti.

KATASTAR DOBIO GEODETSKI INSTRUMENT



Federalna uprava za geodetske i imovinsko-pravne poslove je dana 13. 06. 2010. godine izvršila primopredaju geodetskih instrumenata za potrebe općinskih katastara.

Federalna uprava je u suradnji sa Jedinicom za implementaciju projekta Svjetske banke osigurala finansijska sredstva za potrebe pet općinskih katastarskih kancelarija i to: Kreševa, Vareša, Fojnice, Stoca i Bosanskog Petrovca.

Ovom donacijom geodetskog instrumenta katastar Općine Vareš će jednim dijelom da riješi probleme sa kojim se susreću radnici koji rade na premjeru i održavanju katastra zemljišta te u mogome da efikasnije i stručnije odgovore na zahtjeve stranaka.

Uzmemo li u obzir da ovaj instrument spada u generaciju najsavremenijih geodetskih instrumenata koji se nalaze na tržištu i da njegova cijena iznosi 22.533,37 KM bit će nam jasno o kakvom uređaju je riječ.



NAGRADE ZA UČENIKE GENERACIJE OSNOVNIH ŠKOLA

Općinski načelnik gosp. Hamdo Fatić je u utorak 22. 06. 2010. godine u svom kabinetu ugostio učenike generacije vareških osnovnih škola (OŠ „Vareš“ i OŠ „Vareš Majdan“). Ovom prilikom načelnik je za njih troje, dva učenika generacije iz OŠ „Vareš“ i

za jednog učenika generacije iz OŠ „Vareš Majdan“, uručio novčane nagrade u iznosu od po 100 KM za uloženi trud i postignute rezultate. Čestitavši im na postignutom uspjehu, načelnik im je skrenuo pažnju da i u daljnjem školovanju nastave marljivo učiti i raditi i da budu primjer svojim vršnjacima i zajednici u kojoj žive u svim segmentima života.



MALONOGOMETNI TURNIR U DRAGOVIĆIMA

Na stadionu „Luke“ u Mjesnoj zajednici „Dragovići i Mijakovići“ je u subotu 26. 06. 2010. godine održan Tradicionalni malonogometni turnir na kojem je učešće uzelo jedanaest ekipa, a dobru igru i raspoloženje nekoliko stotina posjetilaca nije pokvarila ni kiša koja je otvorila i zatvorila turnir.

Da sve bude na nivou pobrinuo se i organizator koji je posjetiocima osigurao ručak – prisutnima je služen grah pripremljen na tradicionalni način.

Pobjednik turnira je ekipa MZ „Kokošćići“ koja je u finalu bila bolja od ekipe MZ „Striježevo“, a pobjeda je uslijedila nakon izvođenja penala u čijoj realizaciji je bila boja ekipa Kokošćića.

OTVORENA DŽAMIJA NA KADARIĆIMA

U Mjesnoj zajednici „Kadarići“ je u subotu 26. 06. 2010. godine svečanim programom (Mevludom) puštena u funkciju novosagrađena džamija. Ovoj svečanosti su prisustvovali vareški imami na čelu sa glavnim imamom Medžlisa IZ „Vareš“ Sadžid ef. Ramićem, općinski načelnik gosp. Hamdo Fatić, dr. Isa ispred organizacije HUMAN APEL INTERNATIONAL koja je finansirala izgradnju džamije.

Osim zvanica, svečanosti je prisustvovao veliki broj vjernika kako mještana Kadarića tako i mještana drugih mjesnih zajednica kako naše općine tako i sa područja općine Breza.

U svom predavanju glavni imam je naglasio da su ispunjeni svi tehnički uvjeti da se ovaj objekat pusti u funkciju, (što znači da će zvanično otvorenje biti nekom drugom prilikom i kada se ispune preostali uvjeti), kako bi mještani Kadarića u njemu mogli obavljati svoje vjerske dužnosti.

U kontekstu svog obraćanja vjernicima, glavni imam se zahvalio svima koji su na bilo koji način doprinijeli izgradnju kadaričke džamije uz molbu da ih Bog nagradi za uloženi trud. Mještanima Kadarića ništa nije moglo pokvariti raspoloženje, pa ni vrijeme, jer je u subotu bilo veoma hladno i kišovito, a sama spoznaja da su dobili jedan ovakav objekat je jača od svega drugog.





OTKRIVENA SPOMEN-ČESMA ŠEHIDIMA STRIJEŽEVA

U Mjesnoj zajednici „Striježevo“ izgrađeno je spomen-obilježje šehidima Striježeva, Radonjića i Ostrije. Projekat Spomen-česme izradio je Džomba Enver dipl.ing.arh, a gradnju je najvećim dijelom finansiralo Ministarstvo za boračka pitanja Vlade Zeničko-dobojskog kantona uz učešće Općine Vareš, vareških firmi i pojedinaca.

Svečanosti otkrivanja u Striježevu prisustvovali su sugrađani, prijatelji, rodbina i porodice šehida, te gosti iz Vareša, Zenice, Breze, Visokog i

Sarajeva.

Spomen-obilježje otkriveno je simboličnim podizanjem zastave Republike Bosne i Hercegovine sa spomen-kamena. Zastavu su podigli Ahmed Bešić, Sejad Zaimović predsjedavajući Skupštine ZDK i Hamdo Fatić načelnik Općine Vareš.

Činom simboličnog puštanja vode i učenjem Fatihe, sinovi šehida Hajrić Nazif i Edad otkrili su spomen-česmu.

U okviru programa otkrivanja spomen-obilježja imami vareškog Medžlisa proučili su Jasin, a u prepunoj striježevskoj džamiji proučen je kelime-i-tevhid i dova šehidima.



Iz matičnog ureda Vareš

(za mjesec juni/lipanj 2010.)

UMRLI:

Malbašić Ana, rođ. Šabić (1953.), Barnjak Jerko (1941.), Josipović Jelena, rođ. Miočević (1929.), Pešić Ljubica, rođ. Matičević (1939.), Memić Adem (1934.).

OTVOREN HUMANITARNI BROJ

Neophodna transplatacija bubrega

U jednom od prethodnih brojeva smo pisali o humanitarnom koncertu održanom u Diskoteci „Campari“ koji je organizovan s ciljem prikupljanja sredstava za pomoć u liječenju Nahdeta Brkića iz Budoželja, kojem je neophodna transplatacija bubrega, a za koju su mu potrebna velika novčana sredstva.

Ovim putem vas obavještavamo da je uz pomoć Udruge „Majka Tereza“ iz Vareša otvoren humanitarni broj BH Telekoma: **090/ 291-091**, a pozivom na ovaj broj donirate 2 KM.

Napominjemo da je ovaj broj otvoren do 20. jula 2010. godine, a pomoć možete pružiti i uplatom novčanih sredstava na žiroračun

UNICREDIT BANKA:

KM 40211993000,

EUR 40211993101.



IZ PROŠLOSTI VAREŠA

U dane 26. i 27. jula 1943. godine na području Općine Vareš boravio je Vrhovni štab NOV-a Jugoslavije, na čelu sa Titom. Ovaj događaj obilježavan je posebnom manifestacijom pod nazivom „Titovim stazama revolucije“ (pravcem Rosulje – Očevija – Mižnovići – Ligatići – Krčevine – Radoševići – Vijaka i Pobilje ...) VREMEPLOVI ZAVIČAJNE ZBIRKE

Odlukom Radničkog savjeta Rudnika i Željezare Vareš 01. juna 1956. godine pokrenut je „prvi radnički list u Varešu“ pod nazivom „Naš Kolektiv“. Sa kraćim prekidima (1971. i 1972.), list „Kolektiv“ je izlazio preko 40 godina i u više od 400 štampanih brojeva postao dragocjen informator i hroničar zbivanja u Varešu i okolini u jednom dužem vremenskom periodu. VREMEPLOVI ZAVIČAJNE ZBIRKE

U selu Očevija kod Vareša 08. jula

1962. godine otvorena je nova zgrada osnovne škole. Za izgradnju škole utrošeno je 9 miliona dinara, a stanovnici Očevije izveli su preko 30 masovnih akcija na čelu sa tadašnjim učiteljem Milašinom Todorovićem. VREMEPLOVI ZAVIČAJNE ZBIRKE

Za 04. juli 1964. u Mijakovićima otkrivena spomen-ploča prvom partizanskom odborniku S. Ibrišimoviću „Brki“. VREMEPLOVI ZAVIČAJNE ZBIRKE

Početak juna mjeseca 1970. godine Vareš i Stari grad Bobovac posjetio je nobelovac Ivo Andrić, u pratnji Rodoljuba Čolakovića-Ročka (...) VREMEPLOVI ZAVIČAJNE ZBIRKE

Gost javne tribine u Varešu, 11. jula 1973. godine, bio je predsjednik Skupštine SRBiH – Hamdija Pozderac, koji je održao predavanje „O značaju Ustavskih promjena SFRJ i SRBiH... KOLEKTIV

Na dan 27. jula 1974. godine svečano je otvorena prva predškolska ustanova u Varešu, Dječije obdanište „Danica Pavlič“... VREMEPLOVI ZAVIČAJNE ZBIRKE

Početak jula mjeseca 1980. godine svečano je otvoren novosagrađeni Dom kulture u Kokošćicima. VREMEPLOVI ZAVIČAJNE ZBIRKE

U Varešu su od 09. do 12. jula 1984. godine snimljene posljednje scene filma Emira Kusturice „Otac na službenom putu“. VREMEPLOVI ZAVIČAJNE ZBIRKE

U periodu od 14. 07. do 21. 07. 2001. godine održana je prva manifestacija „Vareško ljeto“. Da je kultura nasušna potreba, u to nema sumnje, pa se pokazalo da je – u svakom slučaju „bolje sa ljetom nego bez ljeta“. VREMEPLOVI ZAVIČAJNE ZBIRKE

SVEČANI ISPRAĆAJ U PENZIJU

Sindikata radnika Općine Vareš je u Maloj sali Općine Vareš, 07. 07. 2010. godine upriličio svečani ispraćaj u zasluženu penziju dva dugogodišnja radnika Općine Vareš, gospođe Hamide Vezir i gospodina Faruka Bešića.

Prigodne poklone našim budućim penzionerima je u ime Sindikata rad-

nika Općine Vareš uručio pomoćnik načelnika i šef Službe za opću upravu, gosp. Čedomir Jelić.

Gospodin Jelić je ovom prilikom čestitao Hamidi i Faruku, poželjevši im sreću, zdravlje i dugo uživanje u penziji i penzionerskim danima.

POSTAVLJENE NIŠE ZA KONTEJNERE

Javno komunalno preduzeće „Vareš“ koje je i dobilo tender koji je raspisala Općina Vareš za izgradnju niša za kontejnere je ovih dana i pristupilo izvođenju radova na izgradnji i montiranju istih. Izgradnja niša za kontejnere će doprinijeti boljoj higijeni grada.

